

## 41. Landjugenddag

# *Upaken a selwer eppes bewegen*

**D'Wuert vum Här Buergermeeschter Georges Fohl um Eierewäin, dee vun der Gemeng am Veräinshaus zu Garnich offréiert gouf**

**D**ir Dammen a Dir Hären, ech begréissen Iech ganz häerzlech am Veräinshaus hei zu Garnich. En extrae Merci fir hir Präsenz un de Minister Claude Meisch, den Député-Maire Emile Eicher vu Clief an un den Deputéierten a Schäffe Max Hahn vun Dippech.

E grouse Merci och un den Här Äerzbëschof Jean-Claude Hollerich - an ech profitéieren direkt dovunner fir Merci ze soe fir déi schéi Mass haut de Moien an der Porkierch zu Garnich, an alleguer deenen, déi zu der flotter Gestaltung bäigedroen hunn. Ech denken, datt eisen Dechen, den Här Tom Kerger, dee sech jo zesumme mat der Chorale ëmmer vill Méi gött, mer Recht muss ginn, wann ech soen, datt mer haut eppes Exzeptionelles hei zu Garnich erlieft hunn.



Ech begréissen dann och d'Kolleginnen a Kollegen aus dem Garnicher Gemengen- a Schäfferot, d'Éieregäsch an alleguer d'Frënn vun der Landjugend.

### **Häerzlech Wëllkomm an der Landgemeng Garnich**



Ech sinn houfreg, datt den 41. Landjugenddag dëst Joer an eiser Gemeng stattfënnt. Garnich ass, wéi der wësst, eng relativ kleng Gemeng hei am Süden. Kierzlech hu mer den 2.000-ten Awunner gefeiert, eng kleng Portugisin mam Numm Maria. Garnich stellt sech also duer als eng offen a modern Gemeng mat enger gudder sozialer a kultureller Mëschung, mee awer och mat Sënn fir Traditioun. Mäer bleiwen eng klassesch Landgemeng mat Bauerebetriber a vill schéi Natur, och well mäer eng vun den am schwachste besidde Gemengen am Kanton Capellen sinn - mat 95 Awunner pro km<sup>2</sup>.

Wéi Der wësst, begräift eis Gemeng 4 Dierfer an zwar Garnich, Duelem, Koler an dat klengsten Duerf Héiweng. Mäer sinn eng Gemeng mat enger ganz spezieller Situatioun, déi eemoleg am Land ass: D'Duerf Grass aus der Gemeng Stengefort ass tatsächlech eng Enclave an eiser Gemeng ouni en direkten Accès un d'Gemeng Stengefort.

Héiweng gouf fir d'éischte Kéier 1256 an engem kierchlechen Dokument ernimmt. Et ass e klengt Duerf mat 130 Awunner, awer iwwer déi Jorhonnerten ëmmer erëm wichteg fir eis Gemeng. Haut virun 200 Joer, also 1815 war zum Beispill e gewëssenen Här Charles Metzler Buergermeeschter a ... Bierger vun Héiweng.

Et kann een op Ärem Internetsite, deen iwwregens flott an iwwersichtlech gestallt ass, noliesen, datt d'Lëtzebuenger Landjugend - Jongbaueren a Jongwënzer a.s.b.l., als Dachorganisatioun 3 Piliere huet:

- Lëtzebuenger Jongbaueren a Jongwënzer a.s.b.l. mat dem President Jeff Boonen. Si vertrieden ënner anerem och déi professionell Interesse vun de jonke Baueren a Wënzer. Ech konnt bei Geleeënheet vun der Visite vum EU-Agrarkommissar Phil Hogan feststellen, mat wat fir enger Kompetenz Äre President dat mécht!
- Den 2. Pilier ass d'Lëtzebuenger Landjugend a.s.b.l mat der Presidentin Kim Siebenaller. Ech giff hirer Nofolgerin Nelly MEYERS wënschen, datt si dat och esou gutt hikritt, wéi hir Virgängerin!



(v.l.n.r.): Nelly Meyers, nei Nationalpresidentin vun der Lëtzebuenger Landjugend, Claude Guth, President vun der Landjugend Süden, Remy Harpes, President vum Dachverband LLJ – JB & JW, Kim Siebenaller, oftriedend Nationalpresidentin vun der Lëtzebuenger Landjugend, Jeff Boonen, Nationalpresident vun de Lëtzebuenger Jongbaueren a Jongwënzer

D'Landjugend regroupéiert Jonker aus dem ländleche Milieu an dréit op ville Plazen zur Duerfentwécklung bäi. Dat

passt iwwregens dann och gutt bei eist Bestriewen an dëser Gemeng, fir d'Liewensqualität an eisen Dierfer weider ze verbesseren.

Ech sinn extra houfreg datt d'Simone Marx, eng Garnicherin, vun 1994 bis 1998 Presidentin vun der Lëtzebuenger Landjugend war.

- Den 3. Pilier ass de Service Coopération mat Ärem Aumônier Romain Richer als President. Dir sidd eng unerkannten ONG, déi Entwécklungsarbecht an Afrika mécht an domadder e wichtege Partner vun der Regierung, wat d'Kooperatioun ubelaangt.

### Verantwortung iwwerhuelen

Dir Dammen an Dir Hären, ech hat d'Chance fir iwwer Chrëscht- an Neijooschdag 1977-1978 mat de Lëtzebuenger Jongbaueren a Jongwënzer eng Rees an den deemolegen Zaïre, haut d'Demokratesch Republik Kongo, ze maachen. D'Zil war eng Géigend, déi Djuma heescht a 500 km östlech vu Kinshasa läit.

Et war e Grupp vu 25 jonke Lëtzebuenger, déi geleet gouf vum President Roger Weber a vum Nationalaumônier Léon Kirsch. Et huet sech ëm e Projet gehandelt, dee nach vum Pater Spoden initiéiert gouf, e Mann deen déi Eeler ënner äis nach gutt kannt a geschätzt hunn. Mä hunn en Ausbildungszenter fir jonk Bauere gesinn a Brécken, déi gebaut gi si fir déi eenzel Dierfer, de Maniokhändler och a Reenzäiten zougänglech ze maachen. Op der Plaz gouf dat Ganzt ëmgesat vum Camille Pletschette, dee leider virun e puer Joer verstuerwen ass.

Firwat zielen ech lech dat? Mee ganz einfach well dës Rees mech als jonke Borscht geprägt huet! Net nëmmen, datt et e formidabelt Erleefnes war, mee et huet mer och kloer gemaach, datt et net duergeet fir

just nozekucken, just ze jéimeren, wann eppes net richtig ass oder ze kritiséieren, mee fir unzepaken, fir selwer eppes ze bewegen ...

Vläicht stinn ech och haut virun lech hei an dëser Funktioun, well ech deemols verstan hunn, datt et am Liewe gëllt, Verantwortung ze iwwerhuelen.

Dir, d'Landjugend, d'Jongbaueren a Jongwënzer, huet Verantwortung, beweegt vill, ganz vill, a speziell och an deene 7 regionale Gruppen. Hei am Süden ass et de Claude Guth, dee President ass, an ech sinn houfreg, datt e jonke Bauer aus eiser Gemeng dëser Regionalgrupp virsteet. Et freet mech och, datt den Aussiedlerhaff Guth zu Héiweng ausgewielt ginn ass fir dëst Evenement. Et weisst, dass och an eiser Gemeng, d'Landwirtschaft mat dësem an och mat anere Betriber eng Zukunft huet an déi Baueren dat och resolut upaken.



*En Deel vun der Equipe vum regionale Landjugendgrupp Süden ronderëm hire President Claude Guth (2.v.l.), déi déi grouss Erausforderung ugeholl hunn, fir den 41. Landjugenddag ze organiséieren*

1975 war den éischte Landjugenddag zu Ëlwen. Haut ass déi 41. Oplag bei äis. Et ass also eng grouss Traditioun ginn, an dat passt ganz gutt zu eisem Bestriewen, hei zu Garnich eng modern Gemeng opzebauen, awer ouni d'Traditioun ze vernoléisseggen.

Iech alleguer wënschen ech nach e flotten, amüsanten Dag an dësem schéinen Eck vun eisem Ländchen a sollt ee vun de Leit, déi um Rallye matginn, sech eventuell iwwer d'Wieder iergeren, da sot einfach, dat wär d'Verantwortung vum Garnicher Schäfferot gewiescht ... All dat, wou Dir d'Verantwortung haut hutt, wäert sécherlech gutt klappen, do sinn ech iwwerzeegt ...

Mär bleift just nach, Iech e puer schéi Stonnen an eiser Gemeng ze wënschen an ech soen Iech Merci fir d'Kommen, awer och fir d'Nolauschteren. Den Här Äerzbëschof huet an der Mass bemierkt, datt et ouni Wäi keng Freed gëtt! Loose mer eis also bei engem Pättche Lëtzebuerger Wäin op dësem schéinen Dag freeën an dorobber, datt et d'Landjugend gëtt.

**Merci**

***Am Numm vun der Lëtzebuerger Landjugend a.s.b.l. an dem regionale Landjugendgrupp Süden, soe mir dem Här Buergermeeschter a senge Kollegen a Kolleginnen aus dem Garnicher Gemengen- a Schäfferot e ganz grouse Merci fir déi wäertvoll Ënnerstëtzung am Virfeld vum Landjugenddag an dee sympatheschen Accueil an hirer Gemeng.***